

## **Dithero tsa Tirelano mo Kutlwanong**

41/2015 Thero ka Sontaga wa 9 morago ga moletlo wa Borarobongwe, e le ka 02. 08. 2015

### **Mo leineng la Modimo o e leng Rara le Morwa le Mowa o o Boitshepo!**

Lefoko le le okamelang beke eno, le kwadilwe mo go Luka 12: 48, le re: **"Mongwe le mongwe yo o neetsweng tse dintsi, go tla batlwa tse dintsi mo go ene; yo o filweng taolo mo go tse dintsi, go tla batlwa tse di fetisang mo go ene."**

1. Sefela sa 284 - 266/272

**2. Thapelo:** Rara yo o mo legodimong, o re itshepise mo boammaaruri. Lefoko la gago ke la boammaaruri. Amen.

3. Lefoko la Testamente e kgologolo le kwadilwe mo go Jer. 1:4-10;

Epistolo ka fa thulaganyong ya 2 e kwadilwe mo go Bafilipo 3:7-14;

Efangele ka fa thulaganyong ya 3 e kwadilwe mo go Matheo 7:24-27.

4. A go ipolelwe tumelo ya bokeresete!

5. Sefela sa 332 - 307/315

6. Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Matheo 25:14-30, e re: "'Gonne go ntse jaaka monna yo o rileng a ya go eta, a bitsa batlhanka ba gagwe, a ba neela di-tsa-gagwe. A neela mongwe ditalente tse tlhano, yo mongwe tse pedi, yo mongwe e le nngwe fela, mongwe le mongwe ka fa nonofong ya gagwe; a ba a akofa a eta. Foo yo o amogetseng ditalente tse tlhano a ya a dira ka tsona, a bapala ditalente tse dingwe tse tlhano. Fela jalo le yo o amogetseng tse pedi a bapala tse dingwe tse pedi. Mme yo o amogetseng e le nngwe fela, a ya a epa fa fatshe, a fitlha madi a morena wa gagwe. Morago ga sebaka se seleele morena wa batlhanka bao a boa, a tla go bona gore a ba dirile ka ditalente. Pele ga tla yo o amogetseng ditalente tse tlhano, a tsisa ditalente tse dingwe tse tlhano a re: 'Morena, o ne o nneetse ditalente tse tlhano; bona, ke bapetse ditalente tse dingwe tse tlhano ka tsona.' Morena wa gagwe a mo raya a re: 'Ahee, o

motlhanka yo o siameng yo o ikanyegang; o ne wa ikanyega mo go tse dipotlana, ke tla go laodisa tse dintsi; tsena mo boitumelong jwa morena wa gago.' Le yo o amogetseng ditalente tse pedi a tla a re: 'Morena, o ne o nneetse ditalente tse pedi; bona, ke bapetse ditalente tse dingwe tse pedi ka tsona.' Morena wa gagwe a mo raya a re: 'Ahee, o motlhanka yo o siameng yo o ikanyegang; o ne wa ikanyega mo go tse dipotlana, ke tla go laodisa tse dintsi; tsena mo boitumelong jwa morena wa gago.' Yo o amogetseng talente e le nngwe fela a tla a re: 'Morena, ke itsile gore o motho yo o bogale, ka o tle o robe kwa o sa jwalang teng, o be o sele kwa o sa gasang teng; mme ke ne ka boifa, ka ya ka fitlha talente ya gago mo mmung; bona, sa gago ke se.' Morena wa gagwe a mo fetola a re: 'Motlhanka yo o bosula le botshwakga ke wena! A o itsile gore ke roba kwa ke sa jwalang teng, ke be ke sele kwa ke sa gasang teng? Fa go ntse jalo, o ne o tshwanetse wa bo o isitse madi a me kwa baatising ba ona, mme nna, mo go tleng ga me nka bo ke amogetse sa me ka koketsego. Jaanong mo tseeleng talente eo, lo e nee yo o nang le ditalente tse some. Gonne mongwe le mongwe yo o dirisitseng sengwe ka boikanyo o tla okelediwa, a ba a nna le letlotlo; mme yo o sa supeng boikanyo o tla amogwa le se o nang naso. Mme motlhanka yo o se nang molemo mo latlheleng kwa lefifing le le kwa ntlentle; go tla nna selelo le phuranyo ya meno teng.'" Amen.

**8. Thero:** Phuthego ya Morena, ke eng se re se dirileng ka botshelo jwa rona, go fitlhela mo letsatsing la kajeno? Re dirang ka metlha? Re dirang ka thata ya rona, ka botlhale jwa rona, ka dineo tsa rona? Wena o dirang ka ditalente tsa gago? Re a itlhotlhomisa. Lereo la ditalente, re le tlwaetse thata. Re re re dirsa moletlo wa ditalente. Lereo leo le tswa mo Segerikeng. Ka Setlhaping le re: "talents", re re: "He has many talents." Yoo o na le dinonofo, dineo tse dintsi. Lereo le neo e supa Monei wa dineo tsotlhe, jaaka re buisa mo go 1 Bakor. 4:7 gore "o na le eng se o sa se newang?" Dineo di tswa mo Motlhoding, jaaka re bona ka batlhanka ba lefoko la thero. Morena yole o neile batlhanka ba gagwe ditalente. Re neilwe dineo, nna tsa me, wena tsa gago. Re a dumalana, re re: Go ntse jalo. Go a bonala, fa re bitsa bana ba rona, re re: "Mpho", gongwe "Dineo." Kana ga re tshwane. Ga go na yo o tshwanang le yo mongwe. Fela jalo le dineo di a farologanya. Mongwe o neilwe thata e kgolo mo mmeleng, yo mongwe o filwe neo e kgolo ya tlhaloganyo e ntle. Mongwe o dira sentle ka diatla tsa gagwe. Yo mongwe o na le neo ya go bua sentle mo dipitsong. Mongwe ke morekisi yo o kgonang go rekisa tsotlhe. Yo mongwe ke moagi wa matlo. Yo mongwe ke mothudi yo o siameng. Molemi yo o nonofileng ke yo mongwe. Yo mongwe o ruta sentle gore bana ba mo rate thata, o tlhalosa dithuto sentle gore botlhe ba tlhaloganye kgang ka pele, le bone ba ba bokoa. Yo mongwe o thusa ba bangwe mo ditlalelong

tša bone, gantsi mo sephiring fela, ka gongwe ka go gomotsa ba ba hutsafetseng, le ba ba lelang. Mafoko a gagwe a tsena mo pelong, a tsoseletsa bahutsafadi gore ba busediwe mo tsholofelong. Yo mongwe o na le neo ya go fodisa, le go thusa balwetsi. Yo mongwe o neilwe go rapela ka mafoko a mantle gore ba bangwe ba thusiwe ka dithapelelo tša gagwe. Yo mongwe o na le moriti o o kalo gore ba bangwe ba didimale, ba reetse, ba utlwe, fa a ema go bua, ba bangwe ba amogela se a se bolelang. Yo mongwe a na le neo go thusa baganetsanyi gore ba letlane. Yo mongwe ke yo o apayang sentle, tse di apeilweng ke ene di ratiwa ke ba bangwe. Yo o mongwe o kgona go ithuta dipuo ka botlhofo fela, yo mongwe go opela sentle. Re ka oketsa dikao tseo le ka go umaka dineo tse dingwe.

Dineo tsotlhe tseo di ka dirisiwa mo phuthegong. Re dirang ka dineo tša rona? Yole yo o neng a amogela ditalente tse tlhano. Ka pele "a ya a dira ka tsona, a bapala ditalente tse dingwe tse tlhano." Fela jalo yole yo o amogetseng ditalente tse pedi, ene a bapala tse pedi tse dingwe. Mme yo o amogetseng e le nngwe fela, a ya a epa fa fatshe, a fitlha madi a morena wa gagwe. Rona re tshwana le mang fa gare ga ba le bararo bao? Motho ke wena, maungo a tumelo ya gago a ntse jang? O dirisa dineo tša gago jang? Re sa ntse re na le nako go thusa mo tirong ya Morena. Morago ga sebaka se seleele morena wa batlhanka bao a boa, a tla go bona gore a ba dirile ka ditalente. Re dirisitse sebaka se seleele jang? Le sebaka se re nang naso ke neo e re e neilweng ke Morena. Re se dirisa jang? Re tla reng? Kana Morena o re batla mo tirong, re ka reng: Morena o a re tlhoka?

Go na le ba ba reng: Se re se ratang, se re se tlwaetseng thata ke go ipata, le go lela, ka gongwe re a itumela, mme morago ga sebakanyana re a itshwenyegela, ba re: E seng jaanong, moruti, ga ke nako, ke ntse ke bereka. E seng kajeno! Ka gongwe ka moso, gongwe ka motlha o mongwe, bogolo ka beke e e tlang. Ke setshwakga se se buang jalo, e le yo o dumelang ka molomo fela, yo o sa rateng phuthego ya Morena, yo o sa rateng Mopholosi wa gagwe o bua jalo. Go ipata fela, e le mafoko a a monate a a se nang tiro. "Yo o amogetseng talente e le nngwe fela a tla a re: 'Morena, ke itsile gore o motho yo o bogale, ka o tle o robe kwa o sa jwalang teng, o be o sele kwa o sa gasang teng; mme ke ne ka boifa, ka ya ka fitlha talente ya gago mo mmung; bona, sa gago ke se.' Morena wa gagwe a mo fetola a re: 'Motlhanka yo o bosula le botshwakga ke wena! A o itsile gore ke roba kwa ke sa jwalang teng, ke be ke sele kwa ke sa gasang teng? Fa go ntse jalo, o ne o tshwanetse wa bo o isitse madi a me kwa baatising ba ona, mme nna, mo go tleng ga me nka bo ke amogetse sa me ka koketsego. Jaanong mo

tseeleng talente eo, lo e nee yo o nang le ditalente tse some. Gonne mongwe le mongwe yo o dirisitseng sengwe ka boikanyo o tla okelediwa, a ba a nna le letlotlo; mme yo o sa supeng boikanyo o tla amogwa le se o nang naso. Mme motlhanka yo o se nang molemo mo latlheleng kwa lefifing le le kwa ntlentle; go tla nna selelo le phuranyo ya meno teng."

Mongwe le mongwe fa gare ga rona o amogetse khumo e ntle, ke raya Efangele e e monate ya ga Jesu Keresete gore re ye mo mafatsheng otlhe, re e phatlalatse, re bone koketsego gore phuthago ya Morena e gole, e ate mo mafelong otlhe. Rotlhe re ka thusa foo, mongwe ka mafoko a gagwe, yo mongwe ka ditiro tsa gagwe, yo mongwe ka lorato lwa gagwe, yo mongwe ka nako ya gagwe, yo mongwe ka di-tsa-gagwe, yo mongwe ka botlhale jwa gagwe, le fa e le ka eng. Tiro ya Morena ga e direlwe lefela, a go gopolwe gore matsapa mo tirong ya Morena ga se a lefela mo Moreneng. Ka moo dirisa talente ya gago gore phuthago yotlhe le batho ba ba utlwang ba bangwe ba gomodiwe, go tlhomamisiwe, ba tlhomamisediwe mo tumelong. "Gonne mongwe le mongwe yo o dirisitseng sengwe ka boikanyo o tla okelediwa, a ba a nna le letlotlo; mme yo o sa supeng boikanyo o tla amogwa le se o nang naso." A re abelang ba bangwe se re se abetsweng, gore ba pholosiwe mmogo le rona. O leke go tlišetsa yo mongwe yo o sa dumeleng, yo o ikepileng mo aletareng ya Morena ka go mo kopa gore a tsamaye le wena go tsena kereke, go utlwa thero, le atamela mo boibopolong le mo selalelong, ba ba iseng ba kolobediwe gore ba ikopele go kolobediwa. Dirisa neo ya gago, talente ya gago jalo fa gare ga phuthago le mo go ba bangwe gore go bakwe leina la Morena wa rona Jesu Keresete jaanong le ka bosakhutleng. Amen.

**9. Thapelo:** Rara wa rona yo o rategang yo o mo legodimong, re a leboga. O re thuse gore re nne balebeledi ba ba ikanyegileng ba dineo tsa gago ka metlha, re nnele ruri mo go tsona, go ya re abelwa mo bokhutlong ka bopelotlhomogi jwa gago botshelo jo bo sa khutleng ka ntlha ya ga Jesu Keresete. Amen.

Thapelo ya Morena: Rara wa rona yo o mo legodimong ...

10. Sefela sa 178 - 161/168

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. G. Tiedemann, ka ngwaga wa 2015.  
Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.